



Illersornissamut isumaqatigiissutip 1951-imeersup, tassungalu ilassutitut isumaqatigiissutaasut, Inuiaqatigiit aningaasaqarniarnerannut, , suliffissaqartitsiniarnikkut ilinniartitaanikkullu , inuiaqatigiinnut iluaqutaajuarnissaat qulakkeerniarumallugu Naalakkersuisut naalagaaffiup oqartussaasuinut isumaqatigiissutip nalilersoqqinneqarnissaa siunertaralugu saaffiginneqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasorta, Mariane Paviasen, Inuit Ataqtigiiit)

(Siullermeerneqarnera)

Siunnersuuteqartumut siunnersuummut qjanaq.

Tamatta ataatsimoorluta kissaateqarpugut, pissaanilissuarnut takornartanut isumaqatigiissutip maani Kalaallit Nunaanni uagutsinnut iluaqutaassasut. Qularutissaanngilaq, USA-mik Nato-millu peqateqarnissarput pisariaqartikkippit. Taakkumi illersornissakkut sernissussammatigut. Aappaatigut USA aamma Nato-p pisariaqartippaat nunarput nunakkut, immakkut silaannakkullu. Allatut oqaatigalugu, kissaataavoq suleqatigiinnissaq illuatungeriinniit. Suleqatigiinneq taanna pitsaanerpaamik atorniarsarissavarput. Aammali paasissavarput, piviusorsiunngitsunik piumasaqarsinnaannginnatta.

Tusartuarpara, suli arlaqartut, isumaqartunik, amerikarmiut Pituffimmiinnerannik ineqarnermut akiliutitullusooq akiliisitsinissamik piumasaqartunik. Tamanna piviusorsiunngilaq. USA tamakkununnga "ineqarnermut akiliineq" ajorpoq. Sumiluunniit nunarsuarmi taamaaliorneq ajorpoq, aammalu maani taamaaliorunnarani. Taamaattumik illuatungaattigut nukigut atortigit periarfissaqartunik ukkatarinninnissamut.

Demokraatit tulluusimaarutigaat, uagut maani nunatsinni ataatsimooratta Pituffiullu kalaallinit ingerlanneqaqqilernissaanut sorsuuteqarsimagatta. Sorsuutiginninneq taanna iluatsippoq, januaarillu aallaqqaataani 2024 kalaallit suliffeqarfiutaata Inuksuk A/S ingerlatsinermut isumaqatigiissut tigussavaa. Tamanna pitsaasumik neriulersitsivoq.

Taamatuttaaq iluarisimaarnarpoq, Naalakkersuisut pitsaanerpaamik piareersarnissaq kissaatigimmassuk danskit oqartussaannut saaffiginninnginnermi. Naalakkersuisut allannguutissatut siunnersuutaat malillugu, partiit sukumiisumik peqataatinneqarumapput Naalagaaffimmi Oqartussanut saaffiginninnginnermi. Silatusaartumik tamanna iliorniarnorpasippoq Demokraatillu suliamut tassunga tunniusseqataanissartik qilanaaraat.

Taamatut oqaaseqarluta Naalakkersuisut allannguutissatut siunnersuutaat Nunanut Allanut- aamma Sillimaniarnermut ataatsimiitaliami suliareqqinneqartussatut innersuunneqarpoq.